

赤水玄珠婦人門第二十卷

薛氏校註合宜禁忌凡例

調經門

經水或紫或黑論

居經

月經不通

崩

治赤白帶下

熱入血室

寡婦師尼寒熱如瘧

夢與鬼交

心胸嘈雜

瘀癖疝瘕

脬轉小便不利

小便數

遺尿失禁

孕山更不歸

小雙姑

卷二十

赤水玄珠婦人門第二十卷

新安生生子孫一奎著輯

薛氏校註合宜禁忌凡例

一云丹溪謂白芍藥性寒味酸產後宜忌恐伐生
生之氣若用之於大補湯八珍等湯內以酒拌
炒用無妨凡屬脾胃虛寒虛弱面色痿黃者俱
宜酒拌炒用

一通經丸若脾胃無虧暴怒氣逆或生冷所傷陰
血凝滯月經不通者宜暫用之若脾胃虛弱不

能生血者宜用六君當歸若因脾胃鬱火內耗
其血者宜用歸脾湯若因脾肝鬱怒氣血傷而
月經不通者宜加味逍遙散

一艾附丸若脾胃虛寒陰血不足氣逆發熱月經
不調或胎氣不成者宜暫用之若肝腎虧損陰
虛發熱月經不調或崩漏帶下或便血吐衄小
便淋瀝或晡熱內熱寒熱往來或盜汗自汗不
時倏熱宜用六味地黃丸若兼脾氣不足飲食
少思者佐以六君子湯

一四物湯若脾經血燥發熱或月經不調宜暫用之若因脾經虛熱肝經怒火所致宜四君子佐加味逍遙散若因脾經氣虛血弱晡熱內熱宜用八珍湯加柴胡丹皮若因元氣下陷而致諸症宜補中益氣湯

一人參橘皮湯若胎前氣痞痰滯作嘔不食者宜暫用之若脾胃氣虛胸膈痞脹痰停作嘔飲食少思者宜半夏茯苓湯若因怒動肝火尅制脾土而致前症者宜六君子加柴胡山梔枳殼脾

胃虛寒者六君子加木香砂仁內半夏治脾胃
虛諸症尤當用

一紫蘇順氣飲若胎動不安元氣無虧者宜暫用
之若因脾氣虛弱者宜六君子加紫蘇枳殼鬱
結傷脾者宜四君子加柴胡山梔蘓梗鬱怒傷
肝脾者六君子加柴胡黃芩枳殼

一四物膠艾湯若內熱胎痛下血不止者宜暫用
之若因肝經風熱而下血者用防風子芩丸若
因肝火血熱宜加味逍遙散若脾經鬱火宜加

味歸脾湯若因肝氣虛陷宜補中益氣湯倍加
升麻柴胡若因事下血者宜八珍湯加膠艾

一黃芩白朮二味為安胎之藥若脾胃蘊熱中氣
無虧者宜暫用之凡屬脾胃虛痞飲食少思或
泄瀉嘔吐面色痿黃肢體倦怠者宜六君子湯
一達生散若厚味安逸者宜用若芻蕘勞役者不
宜用

一妊娠腹痛須驗其面赤舌青者此胎已死用平
胃散加朴硝三錢下之下後隨用八珍大補等

湯調補之若唇口俱青吐出痰沫者子母俱死也若面舌俱青者母死子活產下亦死

一小續命湯若外中風邪腰背反傷筋脉痠癢者宜暫用之若產後失血過多陽火熾盛虛熱生風者宜八珍湯加釣藤丹皮如不應當用四君子湯加當歸丹皮釣藤若陽氣脫陷者宜補中益氣湯如不應急加附子氣虛血敗者宜用十全大補湯如不應急加附子亦有生者

一澤蘭湯若產後惡露腹痛胸滿少氣宜用之若

體倦面黃食少少寐而惡露不止宜加味歸脾
湯若氣血虛損而惡露上攻先用失笑散後用
八珍湯禁用黑神散奪命丹之類

一產後口鼻起黑氣鼻衄者是胃氣虛敗而血滯
也急用二味參蘓飲多有生者

宮人孀婦治驗

一婦人年三十有七早孀居兩腿骨作痛晡熱體
倦月經不調或發寒熱數年矣一日頸項兩側
結核兩脇脹痛此係肝經鬱火而成也先用小

柴胡湯合四物數劑肝症頓愈又用加味逍遙散加澤蘭乳香沒藥三十劑血症漸痊再用加味歸脾湯年餘而安

一孀婦兩腿作痛或用除濕化痰等藥遍身作痛而無定處此血症也不信乃服流氣飲之類而效

一放出宮人年四十餘臀腿內股作痛晡熱口乾月經不調此係肝經血少不能養經絡而然也宜加味逍遙散加澤蘭葉五十帖諸症稍緩又

以歸脾湯二百餘劑而痊

一放出宮人臀腿腫痛內熱晡熱惡寒體倦咳嗽
胸痞月經過期而少彼以為氣毒流注服清熱
理氣之劑益甚此肝經瘀血停留所致蓋肝經
上貫鬲布脇肋循喉嚨下循脘內臍繞陰器抵
少腹主治之法但當補其所不勝而制其所勝
補者脾也制者肝也經曰虛即補之實則瀉之
此定法也彼不信仍服前藥遂致不起

婦人症與男子無以異也所異者月水胎產崩帶

等症耳今惟蒐其異與赤紫者集為一門餘雜症治同男子當於雜症門中求之茲不重錄

調經門

岐伯曰女子七歲腎氣盛齒更髮長二七而天癸至任脉通太衝脉盛月事以時下天謂天真之氣癸謂壬癸之水故云天癸也然衝為血海任主胞胎二脉流通經血漸盈應時而下常以三旬一見以像月盈則虧也若遇經行最宜謹慎否則與產後症相類若經行惱怒勞役則氣血

錯亂經脉不行多致癆瘵等疾若逆於頭面肢體之間則重痛不寧若怒氣傷肝則頭暈脇痛嘔血而癆瘵癰瘍若經血內滲則竅穴淋瀝無已然此六淫外侵而變症百出犯時微若秋毫成患重如山岳可不畏哉

褚澄遺書曰飲食五味養骨髓肌肉毛髮男子為陽：中必有陰；中之數八故一八而陽精升二八而陽精溢女子為陰：中必有陽；中之數七故一七而陰血升二七而陰血溢皆飲食

五味之實透也方其升也智慮開明齒牙更始
髮黃者黑筋弱者強暨其溢也凡充身軀手足
耳目之餘雖針芥之厯無有不下凡子形肖父
母者以其精血嘗於父母之身無所不厯也是
以父一肢廢則子一肢不肖其父母一目虧則
子一目不肖其父母然雌鳥牝獸無天癸而成
胎何也鳥獸精血往來尾間也精未通而御女
以通其精則五體有不滿之處異日有難狀之
疾陰已痿而思色以降其精則精不出而內敗

小便澀而為淋精已耗而復竭之則大小便卒
痛愈痛即愈便愈便即愈痛女人天癸既至十
年無男子合則不調未踰十年思男子合亦不
調不調則舊血不出新血悞行或漬而入骨或
變而為腫後雖合而難子合多則漚枯虛人產
衆則血枯殺人觀其精血思過半矣

夫血者水穀之精氣也和調五臟洒陳六府男子
化而為精女人上為乳汁下為經水故雖心主
血肝藏血亦皆統攝於脾補脾和胃血自生矣

凡經行之際禁用苦寒辛散之藥飲食亦然
王子亨方論曰經者常候也謂候其一身之陰陽
愆伏知其安危故每月一至太過不及皆為不
調陽太過則先期而至陰不及則後時而來其
有乍多乍少斷絕不行崩漏不止皆由陰陽衰
盛所致故曰血氣和平則樂有子和則陰陽不
爭月水以時下也

薛氏曰經云脾統血肝藏血婦人多因恚怒傷肝
鬱結傷脾所致當從二經為主而參以前論治

之

產寶方序論曰大率治病先論其所主男子調其
氣女人調其血氣血者人之神也然婦人以血
為基本苟能謹于調護則血氣宣行其神自清
月水為期血凝成孕若脾胃虛弱不能飲食榮
衛不足月經不行肌膚黃燥面無光澤寒熱腹
痛難於子息或帶下崩漏血不流行則成瘕症
經水或紫或黑論

丹溪曰經水者陰血也陰必從陽故其色赤稟火